

萬千星輝頒獎典禮 2017

50 周年光輝大獎 講詞 (汪明荃小姐)

呢個獎好特別，係今年新加嘅一個獎，好多謝公司咁重視人才，而我好榮幸可以代表過去 50 年，每一位曾經參與 TVB 嘅藝員攞呢個獎。

我係 1971 年加入 TVB。呢 47 年，我都見過接近一萬位藝員喺呢度出現：其中有好多已經成為國際巨星，有啲仲喺演藝圈打拼，有好多離開咗我哋，但係亦有好多新面孔，繼續喺呢度接棒，為電視業工作。而我哋每一位，都喺 TVB 付出過好多努力，因為我哋知道，無論做戲或者做節目，最重要就係對得住觀眾！所以拎呢個獎，我哋每一位，都絕對係實·至·名·歸！

其實作為藝人，我係好感激 TVB。因為呢度就好似一間少林寺，畀機會我哋去學、去做、去演，不過喺擁有呢啲機會嘅同時，我都希望大家，唔單止要做好本份，仲要不停增值，因為大家都知，而家我哋面對緊一個更大嘅市場，同埋一個日新月異嘅網絡時代！TVB 要繼續帶領整個行業，就需要我哋台前幕後團結一致，裝備好自己，而且配合公司發展，一齊去打呢場硬仗，我哋至可以守住我哋前輩建立咗 50 年嘅基業，亦即係我哋每位 TVB 藝員嘅家！

喺度我再次代表 50 年嘅藝人，衷心感激公司以呢個獎，表達對我哋嘅肯定，而我亦都希望公司會好好珍惜我哋每一位，雖然我哋個個都好搏、好肯捱，但係如果人工可以多啲啲、休息時間多啲啲，關心多啲啲，山頭文化少啲啲，咁就一定可以發掘同埋挽留到人才！而我哋亦都可以做得更加開心，士氣更加高漲，令我哋可以好自豪咁同人講：我，係嚟自 TVB 嘅！

希望我哋台前幕後上下一心，全力以赴，同 TVB 迎接第二個精彩嘅 50 年！多謝！